



EDITORIAL

Kusganong pakyason ang brutal nga Oplan Kapayapaan

Niadtong 2017, hilabihan ka hambog nga gideklara ni Rodrigo Duterte ug sa Armed Forces of the Philippines (AFP) nga hingpit ni-lang puuhon ang Bagong Hukbong Bayan (BHB) sa 2018 ilalum sa Oplan Kapayapaan. Mas ambisyoso kini kumpara sa hingpit nga napakyas nga deklarasyong "wad-ag kapuslanan ang BHB" ilalum sa Oplan Bayanihan (2011-2016) sa nangaging rehimeng Aquino.

Sama sa tanang nangaging kontra-rebolusyonaryong gubat pagpanumpogikan pa sa panahon ni Marcos, mapakyas si Duterte ug ang iyang Oplan Kapayapaan nga makab-ot ang gideklarang ambisyon niini. Dili mapakgang ang tinguha sa katawhan alang sa katingbanong hustisya, tinuod nga demokrasya ug nasudnong kagawasan unsapaman ka bangis ang armadong brutalidad ni Duterte aron panalipdan ang interes sa mga madaugdaugon ug mapahimuslanon.

Sa desperasyon nga puuhon ang armadong pagsukol sa katawhang Pilipino, gipagrabe ni Duterte ang

kontra-rebolusyonaryong gyera gamit ang tibuok armadong makinarya sa estado. Gigamit ni Duterte ug sa AFP ang taktika sa malukpanong okupasyon sa mga barangay sa kabanikanhan ug pagpanghadlok ug pagpamugos sa katawhan. Tumong niining pakgangan ang pakigbisog sa masang mag-uuma ug mga katawhang minorya alang sa yuta, hatagag-dalan ang interes sa langyaw'ng dagkung korporasyon sa pagmina ug mga plantasyon ug babagan ang pagsalmot sa masa sa armadong pakigbisog ug pagsuporta sa hukbong bayan.

"Oplan Kapayapaan..." sundi sa panid 2

Bag-ong tukod nga batalyon, giatake sa BHB-Isabela

GIATAKE SA BAGONG Hukbong Bayan-Central Isabela (Reynaldo Piñon Command o RPC) ang 95th IB, usa sa mga bag-ong tukod nga batalyon sa AFP, nga anaa ilalum sa 5th ID.

Mokabat sa 12 ang napatay ug tulo ang samaron sa dihang ambuson sa mga Pulang manggugubat ang usa ka platoon sa 95th IB sa Barangay Sindon Bayabo, Ilagan City niadtong Agosto 16, alas-5 sa buntag. Lakip sa mga napatay si Sgt. Junie Iyadan. Nakasakmit og usa ka R4 assault rifle ug 10 ka magasin ang BHB gikan sa maong ambus. Isip balos, nagpaulan og bomba ug bala gikan sa duha ka helikopter ang AFP. Nagbungan kini og

"95th IB..." sundi sa panid 4

Kalambigit niini, sa mga lugar nga nag-unang gikonsentrahan sa AFP, naglunsad ang mga yunit niini og mga operasyong pagdumog o mga "focused military operation" gamit ang daghang pwersa batok sa mga yunit sa BHB. Adunay mga operasyong ginadirihe sa ang-ang dibisyon o *area command* ug nagpalihok og gidak-ong batalyon nga mga pwersang pangmaniobra aron ihimulag ug kubkubon ang yunit o mga yunit sa BHB sa lugar. Nagagamit og mga *drone* alang sa sarbeylans. Nagagamit kini og mga helikopter, gapanghulog og bomba ug *rocket* ug gapanganyon aron hadlukon ang katawhan.

Sa pagsulay nga sakupon ang tanang natarang gerilya ug erya nga langkob sa teritoryo o ginalihukan sa rebolusyonaryong kalihukan, nag-apas si Duterte nga labaw pang padak-on ang AFP. Nagtukod ang AFP og 10 ka bag-ong batalyon alang sa kinatibuk-ang 97 ka batalyon. Target niining makarekrut og 15,000 ka sundalo hangtud sa katapusan sa tuig ug gihimong

pang-awhag ang saad nga dugang sweldo. Grabe ang paningkamot ni Duterte nga makakuha og lain-laing bag-ong armas gikan sa US ug uban pang nasud. Nangutang siya aron makapalit og dugang mga pusil, bala, helikopter, mga *rocket*, bomba ug uban pang armas.

Luyo sa pagpasubsub sa to-dong-gyera, walay laing kapadulngan si Duterte ug ang AFP kundili hingpit nga pagkapakyas sa pagsulay nga puohon ang rebolusyonaryong armadong pagsukol.

Hilabihan nga nakatag ang pwersa sa AFP. Nakapakat sa Mindanao ang 75 batalyon, 34 sa mga erya sa Moro ug 41 batok sa BHB. Sa ingon, adunay 20-25 ka batalyon lamang ang nakapakat sa Luzon ug Visayas nga naghatag sa BHB sa maong mga rehiyon og lapad nga bintaha aron makapagmaniobra, makapalapad ug makapakusog.

Bisan sa ginalunsad nga mga operasyong pagdumog sa pipila ka rehiyon sa Mindanao, kaya lang sa AFP nga magkonsentra og usa ka batalyon sa mga tropang pangmaniobra aron sakupon ang pipila ka






magkasikbit nga pundok sa mga baryo sulod sa pipila ka semana. Ang uban niining mga tropang pangkombat pausa-usa ka iskwad nga gikalat sa mga baryo nga langkob sa mga natarang gerilya sa BHB kung asa bulnerable sila sa anihilasyon sa mga platun sa BHB. Labaw nga daghang baryo ang walay presensya sa AFP—pamatuod nga dili nila kayang sakupon ang tanang baryo sa tanang higayon.

Grabe na nga gikapoy ang mga upisyal ug tropa sa AFP sa pabalhin-balhin ug walay-undang nga mga operasyon sa natarab nga kanunay man usab nga gakapakyas.

Nabangkarote ang gubyerno ni Duterte. Misirit na sa kapin 30% ang depisito niini sa badyet niining Enero-Hulyo. Aron mopalit og bagong mga armas, samot niining ginalubong sa utang ang nasud. Sa hisgutang pondo ug pulitika, dili niini kayang adlaw-adlaw nga manganyon o paluparon ang mga helikopter aron manghulog og bomba. Dugang dinhi, batbat sa korapsyon ang militar. Nag-imbento og listahan sa mga "surrenderee" ang mga upisyal aron mabulsa ang pondo alang sa "integrasyon." Ginakibhangan nila bisan ang pondo alang sa operasyon sa ilang mga tropa.

Sa estratehikong panglantaw, walay pulos ang paggamit ni Duterte ug sa AFP sa modernong mga armas. Dili kaya sa mga bomba ug *rocket* nga patagon ang mga bukid ni bisan puohon ang mga yunit sa BHB nga hanas sa paggamit sa mga taktikang gerilya ug nakahiagom sa lalum ug lapad nga suport sa masa.

Mapakyas si Duterte sa ambisyon niyang puohon ang BHB tungod kay hilabihan siyang nahimulag sa katawhang Pilipino. Samtang grabeng nahimong bangis ug brutal ang armadong pagpanumpo, labaw usab niyang ginaawhag ang katawhan nga mag-armas ug mosukol. Luyo sa Oplan Kapayapaan, wala'g tuo ang mga paglapas sa katungod-tawo. Libuhan ka katawhan ang ginahadlok matag adlaw, ginapugos ug ginahulga sa mga

 <p>Bolyum XLIX Ihap 17 Setyembre 7, 2018</p> <p>Ang <i>Ang Bayan</i> ginapagawas sa pinulongang Pilipino, Bisaya, Iloko, Hiligaynon, Waray ug Ingles. Nagadawat ang <i>Ang Bayan</i> og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p> <p>  instagram.com/sine.proletaryo  @prwc_info  fb.com/groups/cppinformationbureau  cppinformationbureau@gmail.com </p>	<h2 style="text-align: center;">Unod</h2> <p>Editorial: Kusganong pakyason</p> <table border="0"> <tr><td>ang Oplan Kapayapaan</td><td style="text-align: right;">1</td></tr> <tr><td>95th IB, giatake sa BHB</td><td style="text-align: right;">1</td></tr> <tr><td>2 ka operasyong mina, giparalisa</td><td style="text-align: right;">4</td></tr> <tr><td>10 M16, nasakmit gikan sa Lapinig</td><td style="text-align: right;">5</td></tr> <tr><td>Pagpamomba sa Mindanao</td><td style="text-align: right;">5</td></tr> <tr><td>Nagkagrabeng krisis sa ekonomiya</td><td style="text-align: right;">6</td></tr> <tr><td>Ibasura ang OLBARRM—MRLO</td><td style="text-align: right;">7</td></tr> <tr><td>Martsa sa mga mamumuo</td><td style="text-align: right;">8</td></tr> <tr><td>Pagbawi sa yutang kabilin</td><td style="text-align: right;">8</td></tr> <tr><td>Kadaut sa militar ug pulis</td><td style="text-align: right;">9</td></tr> <tr><td>Krisis sa bugas ug pagkaon</td><td style="text-align: right;">11</td></tr> <tr><td>Masaker sa India</td><td style="text-align: right;">12</td></tr> <tr><td>Panaghiusa sa Colombia</td><td style="text-align: right;">13</td></tr> </table>	ang Oplan Kapayapaan	1	95th IB, giatake sa BHB	1	2 ka operasyong mina, giparalisa	4	10 M16, nasakmit gikan sa Lapinig	5	Pagpamomba sa Mindanao	5	Nagkagrabeng krisis sa ekonomiya	6	Ibasura ang OLBARRM—MRLO	7	Martsa sa mga mamumuo	8	Pagbawi sa yutang kabilin	8	Kadaut sa militar ug pulis	9	Krisis sa bugas ug pagkaon	11	Masaker sa India	12	Panaghiusa sa Colombia	13
	ang Oplan Kapayapaan	1																									
95th IB, giatake sa BHB	1																										
2 ka operasyong mina, giparalisa	4																										
10 M16, nasakmit gikan sa Lapinig	5																										
Pagpamomba sa Mindanao	5																										
Nagkagrabeng krisis sa ekonomiya	6																										
Ibasura ang OLBARRM—MRLO	7																										
Martsa sa mga mamumuo	8																										
Pagbawi sa yutang kabilin	8																										
Kadaut sa militar ug pulis	9																										
Krisis sa bugas ug pagkaon	11																										
Masaker sa India	12																										
Panaghiusa sa Colombia	13																										
<p>Ang <i>Ang Bayan</i> ginamantala duha ka hugna matag bulan sa Komite Sentral sa Partido Komunista ng Pilipinas</p>																											

pasistang sundalo nga nagasakop sa ilang mga barangay.

Ginaabuso sa mga upisyal sa AFP ang ilang gahum sa arbitrar-yong pagtibuok sa listahan sa mga tawong kinahanglang magpa-"clear" ug pagpamugos kanila nga "mossurender" bisan pa og walay ebidensya nga sila mga myembro sa BHB. Walay pormal nga kasong ginapasaka sa korte. Daghan ang ginalinlang nga mitambong sa mga panagtapok aron kuno manghatag og pondo o serbisyo nga sa kadugayan pagawason sa midya nga mga "NPA surrenderee."

Lapas na sa tunga sa tuig, wala pay mapakitang mayor nga kadaugan ang AFP ilalum sa Oplan Kapayapaan. Ang bugtong ginapanghinambog sa AFP mao ang ginaingon niining kapin 4,000 ka "misurender" nga sa kamatuoran mga biktima sa walay-undang nga pagpangbahad ug kabangis sa AFP. Matag karon ginadeklara sa militar ang mga "development ready area" apan pasubli-subli man usab nga ginapanghimakak sa ginalunsad nga taktikal nga opensiba sa BHB sa lugar.

Ang tinuod, padayon nga nakalunsad ang BHB og dinaghang mga taktikal nga opensiba. Lakip dinhi ang mga gilunsad dili pa lang dugay sa BHB sa Luzon ug Visayas sama sa Ilocos Sur, Isabela, Mt. Province, Rizal, Quezon, Batangas, Albay, Masbate, Northern Samar, Capiz ug Iloilo.

Luyo sa pagpakat sa halos 50% ka tropa niini batok sa BHB sa Mindanao, padayon nga nakalunsad ang BHB og mga taktikal nga opensiba ug uban pang aksyon sa lima ka rehiyon niini sa Mindanao. Padayon niining ginapatuman ang mga balaod ug palisiya sa demokratikong gubyerno katawhan sa hisgutanan sa ekonomiya, kinaiyahan ug uban pa.

Sa umaabot nga mga bulan, ang nagkanunay ug nagkadakung mga taktikal nga opensiba sa BHB sa tibuok nasud seguradong labaw pang mobinat sa mga pwersa sa AFP.

Sa pagpanguna sa Partido, tibuok-kusog nga pakyaosn sa BHB

ang Oplan Kapayapaan ni Duterte karung tuiga. Mahimo kini sa BHB pinaagi sa paghupot sa linya sa malukpanon ug subsub nga gerilyang pakiggubat subay sa nagkalapad ug nagkalalum nga baseng masa.

Kinahanglang manglimbasog ug mahimong andam sa kalisdanan ug sakripisyo ang tanang Pulang kumander ug manggugubat sa BHB atubangan sa kontra-rebolusyonaryong brutalidad sa gyera ni Duterte. Kinahanglang kanunay taas ang diwang masukulon aron babagan ang pakana sa kaaway sa tanang yugto, panahon ug higayon.

Labaw pang pakusgon ang Partido sulod ug gawas sa ang-ang sa BHB. Kinahanglang hugot nga panguluhan sa Partido ang BHB sa tibuok natad nga pagpatuman niini sa mga gimbuhatong militar ug pulitika. Labaw pang pakusgon ang BHB. Padayon nga mangrekrut ug magbansay sa bag-ong mga Pulang manggugubat.

Sakmiton ang inisyatiba ug pakayason ang mga opensiba sa kaaway sa tanang higayon. Padyon nga palambuon ang pagpakahanas sa pagdapat sa mga taktikang gerilya, pagkonsentra ug pag-inat, paspas nga pagbalhin-balhin, paggamit og lansis aron pasumbagon sa hangin ang kaaway ug birahon ang nipis nga nakakatag niining mga pwersa.

Subsub nga subaybayan ug tunan ang mga planong opensiba sa kaaway sa ang-ang dibisyon ug brigada. Hugot nga tibuokon ang mga taktika, plano ug koordinasyon sa ang-ang rehiyon ug subrehiyon. Kinahanglang hugot nga tumanon sa tanang yunit sa BHB ang mga responsibilidad nila sa gambalay sa kinatibuk-ang plano.

Lunsaron ang mga taktikal nga opensiba sa tibuok nasud nga adunay hustong balanse sa mga punitibo ug anihilatibong mga operasyon. Hatagag-pagtagad ang mga opensibang adunay tumong nga makasakmit og armas gikan sa kaaway.

Kinahanglang mapangahas nga pukawon, organisahon ug palihukon sa BHB ang minilyong masang mag-

uuma ug mga minoryang katawhan ug pasubsubon ang mga antipyudal ug uban pang ekonomikanhong pakigbisog ilabina atubangan sa krisis. Ipataas ang ilang anti-imperyalistang kahimatngon pinaagi sa pagbutyag sa interes sa dagkung langyawng kapitalista nga nagayatak sa ilang kaayuhan. Aktibong palihukon ang masang mag-uuma aron mossalmot sa gubat sa katawhan.

Kusganong iasdang ang mga anti-pasistang pakigbisog. Sa kabanikanhan, lig-on nga suklan ang okupasyon s amilitar sa mga komunidad. Babagan ang kampanya sa pagpanghulga, pagpanghalok ug pagpamugos sa masang mag-uuma nga "mossurender." Hiniusang moli-hok batok sa "surrender list" sa AFP nga sa tinuod listahan sa target sa pagsumpo o likidasyon sa AFP, butang nga supak sa internasyunal nga balaod nga naghatagproteksyon sa mga sibilyan, ug iligal bisan ilalum sa reaksyunaryong balaod. Paningkamutan nga lig-ong iasdang ang mga pakigbisog pangekonomiko sa panahon ng militarisasyon, igiit ang lehitimong mga kahilingan at ikawing sa anti-pasistang pagsukol.

Sa kasyudaran, kadungan sa pagpaasdang sa demokratikong pakigbisog sa lain-laing sektor, aktibong ibutyag ang pasistang kabangis sa AFP sa kabanikanhan, ilabina ang armadong pagpanumpo ug pagpamig-ot batok sa mga sibilyan. Ipalanog ang singgit aron tapuson ang balaod militar sa Mindanao ug pagharing militar sa tibuok nasud.

Ipakitang husto ug makatarunganon ang armadong pagsukol sa masa aron panaliptan ang ilang yuta ug iasdang ang ilang kaayuhan. Labaw pang papaspason ang pagpangrekrut sa mga mamumuo sa BHB, ingonman sa mga estudyante, uban pang mga intelektwal ug demokratikong sektor.

Labaw pang palapdon ang panaghiusa batok sa pasismo ug tiranya ni Duterte. Palihukon ang tibuok katawhan aron ibagsak ang iyang rehimen. AB

grabeng kahadlok sa katawhan ug midaut sa ilang panginabuhian. Duha ka kabaw ang napatay.

Ayha niini, gidisarmahan sa mga Pulang manggugubat ang mga myembro sa Task Force Kalikasan (TFK) sa Sindon Highway sa parehong barangay niadtong Agosto 14, alas-9 sa gabii. Ang TFK ang nag-unang tigpangahoy ug nagpahimulos sa mga rekurso sa kabukiran sa Sierra Madre. Gapangkumpiska ang mga ginsakpan niini og troso aron ibaligya ug makapahimulos sa kita gikan dinhi. Gapangilkil usab kini sa madakop nilang gamayng magtotroso og hangtud sa P2,000 kada byahe samtang P10,000 usab ang ginasingil nila sa mga mang-uwayay.

Giaresto usab sa BHB-Central Isabela sa parehong haywey si PO2 Danilo Maur samtang ginabyahe niya ang 3,000 *boardfeet* sa iligal nga troso niadtong Agosto 15, alas-11 sa gabii. Usa ka aktibong ahente s paniktik si Maur. Ginagamit niyang prente ang pagpangahoy ug pagpaninda aron maniktik sa mga teritoryo sa gubyrno sa katawhan. Giwas niini, naila siya nga mangilkilay sa ubang magtotroso ug mang-uwayay. Nasakmit kaniya ang usa ka pistolang .45.

Gideklarang POW o *prisoner of war* si Maur samtang ginaimbestigahan sa iyang mga krimen sa batok sa katawhan. Gibuhian siya human ang tulo ka adlaw nga imbestigasyon. Boluntaryo siyang nagsaad nga ihunong niya ang pagpaniktik sa katawhan ug mga kriminal nga aktibidad. Gipasa siya sa iyang pamilya niadtong Agosto 19 sa alas-2 sa hapon.

Samtang naglunsad usab og mga armadong aksyon ang mga yunit sa BHB sa lain-laing bahin sa nasud.

Ilocos Sur. Giatake sa BHB-Ilocos Sur (Alfredo Cesar Jr Command o ACC) ang hedkwarters sa 81st IB sa Barangay Bugbuga, lungsod sa Sta. Cruz niadtong gabii sa Agosto 9. Matud sa pamahayag ni Saniata Maglaya, tigpamaba sa ACC, usa ka upisyal ang napatay ug

Operasyon sa 2 ka kumpanya sa mina, giparalisa sa BHB

GIPARALISA SA BAGONG Hukbong Bayan (BHB) ang magun-ubong mga operasyon sa duha ka dagkung kumpanya sa pagmina niadtong Agosto sa mga lungsod sa Las Nieves, Agusan del Norte ug San Mateo, Rizal.

Usa ka *dredger* (barko nga gigamit sa pagmina sa black sand ug uban pang mineral sa Agusan River) ang gisunog sa usa ka yunit sa BHB sa Purok 1-B, Barangay Lingayao, Las Nieves niadtong Agosto 24 sa gabii. Gisulod sa mga Pulang manggugubat ang *dredger* nga anaa sa pampang. Gipanaog nila ang upat ka tripulante lakip ang kapitan sa *dredger*. Gidisarmahan nila ang usa ka gwardya nga adunay *shotgun* ayha gisunog ang barko.

Gipanag-iyahan sa Ark Green Dynamic Resources Corporation ang maong *dredger*. Makadaot ang operasyon niini sa Agusan River. Gaproseso usab ang maong korporasyon sa mga hugaw gikan sa pagmina pabalik sa Agusan River.

Samtang giparalisa sa BHB-Rizal niadtong Agosto 12 ang makinarya sa Monte Rock Corporation, usa ka kumpanya sa *quarry*, nga imbuelto sa magun-

ubong pagmina sa Barangay Guitnang Bayan 2, San Mateo, Rizal.

Matud sa BHB-Rizal, ang duha ka oras nga reyde usa ka puni-tibong aksyong batok sa kumpanya nga pipila ka tuig na nga nagmina og bato sa bukirong bahin sa Rizal. Ang maong mga operasyon nagbunga og malukpanong pagbaha dili lamang sa San Mateo kundili bisan sa mga lungsod sa Marikina ug sa Metro Manila. Gilunsad ang reyde human sa malukpanong pagbaha sa San Mateo bunga sa Bagyong Karding.

Giguba sa BHB ang walo ka *dump truck*, duha ka buldoser, duha ka *payloader*, upat ka *backhoe*, upat ka *van* ug mga gamit-upisina. Gidisarmahan usab nila ang mga gwardya sa kumpanya. Nasakmit gikan kani-la ang duha ka *shotgun*, tulo ka pistolang .38 ug lima ka radyong pangkomunikasyon. AB

usa ka sundalo ang samaron sa maong atake.

Matud ni Maglaya, ang 81st IB notoryus sa mga pagpang-abuso niini sa mga sibilyan samtang nagpahigayon og "community support program." Nagsilbi usab silang mga gwardya alang sa proyektong *hydro-power dam* sa lungsod sa Salcedo. Gawas sa napatay ug nasamdan, naguba usab ang tulugan sa mga upisyal, upisyanang pang-administratibo ug usa ka sakyanan, matud mismo sa tigpamaba sa 81st IB.

Masbate. Niadtong Agosto 24, bandang alas 7:45 sa buntag, giambus sa mga Pulang manggugubat sa BHB-Masbate (Jose Rapsing Command) ang mga pulis nga nakasa-

kay sa usa ka sakyanang pangpat-rulya sa Crossing Biyong, Masbate City. Gikan ang maong mga pulis sa ilang detachment sa Barangay Bayombon sa dihang gipabusikaran sila og *command-detonated explosive* (CDX) ug gipabothan sa BHB. Upat sa mga pulis ang samaron, lakip si SPO2 Ariel Espiel.

Rizal. Duha ka elemento sa 80th IB ang grabeng nasamdan sa dihang gipabusikaran sa BHB-Rizal og CDX ang ilang gisakyang trak sa Sityo Tanza 2, San Jose sa Antipolo City niadtong Hulyo 30, bandang alas-9:30 sa buntag.

Giisnapp usab sa usa pa ka yunit sa BHB-Rizal niadtong Hulyo 28

"95th IB...", "sundi sa panid 5

ang mga elemento sa 59th IB nga nag-operasyon sa Barangay Sta. Inez, Tanay, Rizal. Usa ka sundalo ang napatay.

Quezon. Gipabothan sa usa ka yunit sa BHB-Quezon sa Southern Tagalog ang gidak-ong kumpanyang tropa sa 80th IB sa Sityo Sari, Lulumutan niadtong Agosto 13, General Nakar. Napatay ang duha ka sundalo ug grabeng nasamdan ang duha pa.

Pagkahapon sa maong adlaw, usa ka elemento sa 1st IB ang giisnaysay ug napatay sa usa pa ka yunit sa BHB-Quezon sa Barangay Cagsiay II, Mauban. Nagsilbing protektor sa Marcbuilt Construction ang yunit sa maong sundalo. Usa ang Marcbuilt sa mga kumpanyang nangilug og yuta sa mga mag-uuma sa Laguna ug Quezon.

Capiz. Upat ka sundalo sa 61st IB ang nasamdan sa dihang maglunsad og operasyong harasment ang usa ka yunit sa BHB-Central Panay (Jose Percival Estocada Jr Command) niadtong Agosto 26 sa Sityo Naatip, Barangay Lahug. Naglunsad kanhi og operasyong kombat ang 17-kataong yunit sa maong yunit sa dihang gipabusikaran sila og CDX bandang alas-7:00 sa gabii.

Iloilo. Tulo ka pulis ang nasamdan sa usa ka ambus nga gilunsad sa usa ka yunit sa BHB-Southern Front (Napoleon Tumagtang Command) batok sa Iloilo Police Provincial Office's 1st Provincial Mobile Force Company niadtong Agosto 24. Nagpahigayon kanhi og kombat patrol ang mga pulis sa dihang gipabusikaran sila, bandang alas-6:20 sa buntag, sa Barangay Isian, Victoria sa bayan ng Leon.

Lakip sa mga nasamdan si Chief Inspector Abner Jordan, lider sa maong yunit.

Compostela Valley. Giambus sa usa ka yunit sa BHB-Compostela Valley ang nagpatrulyang tropa sa 46th IB sa Manangkol, Golden Valley sa lungsod sa Mabini. Tulo ka sundalo ang napatay. AB

10 M16, nasakmit gikan sa PNP-Lapinig

PNP-Lapinig NAPULO KA RIPLING M16, duha ka pistolang .9 mm, usa ka libong bala sa M16 ug 49 ka piraso sa mga magasin ang nasakmit sa Bagong Hukbong Bayan-Northern Samar (Rodante Urtal Command o RUC) sa malampuson nga reyd sa istasyon sa pulis sa lungsod sa Lapinig niadtong Agosto 10. Nakakumpiska usab ang mga Pulang manggugubat og teleskopyo, tulo ka *laptop computer* ug mahinungdanong dokumento.

Sa pamahayag nga gipagawas sa RUC niadtong Agosto 12, matud niini, usa ka dakung hapak alang sa rehimeng US-Duterte ang reyd sa maong istasyon ilabina nga nagsilbi kining protektor nga sindikato sa iligal nga droga sa Northern Samar.

Matud ni Ka Amado Pesante, tigpamaba sa RUC, samtang ginahimong usa ka "killing machine" o makinarya sa pagpamatay ang Philippine National Police (PNP) sa ipokritong kampanyang Oplan Tokhang sa rehimen, nalambigit usab ang mga pulis niini sa pagnegosyo og iligal nga droga sa daghang lungsod sa prubinsya.

Gamit ang usa ka *dump truck*, gireyd sa Pulang hukbo ang hedkwarters sa pulisya. Lima ka minuto nga pinusilay ang mga pulis ayha misurender. Duha ka pulis ang

samaron.

Niadtong milabayng tuig pa nakadawat na og impormasyon ang BHB gikan sa mga kabus nga mag-uuma mahitungod sa pagkalambigit sa PNP sa iligal nga droga. Dugang pa sa RUC, ginahimong kober sa PNP ang Oplan Tokhang aron pugos nga ipasurender ang mga sibilyan isip mga myembro sa BHB.

Gitaho usab sa RUC sa laing pamahayag niadtong Setyembre 2 ang pito ka aksyong militar nga gilunsad ilalum sa kumand niini gikan Mayo hangtud Hunyo batok sa mga sundalo sa 803rd IBde. Lima sa maong mga opensibang ang gilunsad sa Silvino Lobos, ug tig-isa sa Las Navas ug Lope de Vega. Naka-hiagom ang kaaway sa dili moubos sa walo ka kaswalti, ug nakasakmit ang RUC og mga bala sa M60 ug M16. AB

Pagpamomba sa Mindanao, gigamit alang sa balaod militar

GIKUNDENA SA PARTIDO Komunista ng Pilipinas ang mga pagpamomba sa Isulan, Sultan Kudarat niadtong Agosto 28 ug Setyembre 2 kung asa dili moubos sa upat ang namatay ug halos 50 ka sibilyan ang nasamdan. Gikundena usab sa Partido ang paggamit sa rehimeng US-Duterte sa duha ka insidente aron hatagag-katarungan ang plano niining ikaduhang pagpalungtad sa balaod militar sa Mindanao.

Nakatakdang mahuman ang balaod militar sa isla sa Disyembre 31. Karon pa lang, nagpamahayag na og suporta alang sa pagpalungtad niini ang mga alipures ug alyado ni Rodrigo Duterte. Nanghulga usab si Duterte nga magpatuman og *curfew* sa nasudhong langkob.

Dakung bakak ang ginapaduso sa pulis nga adunay kalambigitan ang rebolusyonaryong kalihukan, partikular ang Bagong Hukbong Bayan (BHB), sa duha ka insidente sa mga pagpamomba. Hugot nga gihuptan sa BHB ang seguridad sa mga sibilyan ug sukwahi sa mga prinsipyo niini ang ibutang sila sa unsamang kadaut.

Gakahitabo ang mas dagku pang krimen ug mga paglapas sa katungod-tawo sa ngalan sa balaod militar. Taas ang listahan sa mga kaso sa malukpanong intimidasyon ug pagpasurender sa mga sibilyan, pugos nga pagpangrekut sa CAFGU, pagpamig-ot ug pagpamatay, militarisasyon ug dinaghang pagtukod og mga detatsment sa ngalan sa "kalinaw ug kalambonan." Biktima usab ang mga sibilyan sa mga "nakapokus" nga operasyong kombat nga nagagamit og mga *rocket* ug bomba. AB

Paspas nga migrabe ang krisis sa ekonomiya

Labaw pang paspas nga migrabe ang krisis sa panginabuhian sa katawhang Pilipino ug nagasangyad ang atrasadong ekonomiya sa Pilipinas ilalum sa rehimenng Duterte. Paspas nga migrabe ang nasinati nilang pagpangdaugdaug ug pagpahimulos ilalum sa mga palisiyang neoliberal nga nagsilbi sa dagkung lokal nga kapitalista ug langyaw, mga agalong yutaan ug burukrata kapitalista.

Sukad sa sinugdanan sa tuig, dili kapugngan ug paspas nga misirit ang presyo sa pagkaon ug uban pang mga batakang panginahanglan. Niining Agosto, miabot na sa 6.4% ang implasyon, pinakapaspas nga pagsirit sa presyo sa halos usa ka dekada. Pinakasakit sa bursa sa katawhan ang pagsaka sa presyo sa bugas. Padayon usab ang pagsaka sa presyo sa *diesel* ug ubang mga produktong petroloyo.

Kaylap ang disempleyo. Dili moubos sa 11 ka milyon ang wala ug kulang ang trabaho. Sa sektor sa agrikultura, dili moubos sa 723,000 ka panginabuhian ang gitaho niadtong Abril nga nawala. Labaw nga midaku ang gintang sa suhulan sa mga mamumuo sa minimum sa kinahanglang kantidad alang sa disen-teng pamuyo.

Makatarunganong idemanda sa katawhang Pilipino si Duterte nga anaa likod sa dili-mapugngan nga pagsaka sa presyo sa mga palaliton tungod sa pagpahamtang sa paantus nga mga buhis ilalum sa balaod nga TRAIN. Sukwahi sa iyang saad nga "maayong kinabuhi," dugang nga palas-anon ug paantus ang dala sa TRAIN, ingonman sa mga pagkibhang sa subsidyo ug uban pang palisiya ni Duterte. Ginapadayon lamang niya ang kanhi nang mga programa ug palisiya sa milabayng mga rehimen. Dili bag-o ang ginaduso niyang "Build, Build, Build" gawas sa tinguha niyang baklason ang kanhing mga sukaranan nga seguridad maghatag-dalan sa kaylap nga korapsyon. Nagkagrabe ang krisis sa panginabuhian sa katawhang Pilipino kadungan sa padayon nga pagsangyad sa ekonomiya sa Pilipinas. Sugod

karong tuiga, mitumaw ang mga ti-mailhan nga mopadulong ang ekonomiya sa Pilipinas sa grabeng krisis.

Misirit ang depisito sa pamatigayon (\$19.1 bilyon niining unang tunga-tunga sa tuig, pinakadukung depisito sa kasaysayan), ang depisito sa balanse sa bayaran (\$3.7 bilyon sa unang pito ka bulan, halos katulohon nga mas daku kumpara sa parehong panahon niadtong 2017) ug ang depisito sa badyet sa guberno (P279.4 bilyon, 36% nga mas taas kumpara sa mao gihapong panahon niadtong 2017).

Pugos nga gitabonan sa rehimen ug sa mga reaksyunaryong teknokrata ang ugat sa krisis sa ekonomiya. Walay kapuol sila sa pagsulting "lig-on ang pundasyon" sa ekonomiya, bisan nga ang kamatuoran mao nga nagnana ang pinaka-ubod sa ekonomiya sa Pilipinas. Labaw kining nagkadunot atubangan sa pangkalibutang kapitalistang krisis ug pag-apas sa mga monopolyong kapitalista nga naghuthot og ganansya pinaagi sa pagpatuman sa mas grabeng dagway sa pagpahimulos.

Atrasado ug dili makabarug sa kaugalingong tiil ang lokal nga eko-

nomiya. Giharian sa dagkung langyawng kapitalista ang lokal nga produksyon nga nakasentro sa pipila ka giilang "economic zones." Nagsalig kini sa importasyon ug nakapunting sa pag-eksport. Wala kini nakatampo sa paglambo sa lokal nga kapasidad sa produksyon ug wala nagatubag sa lokal nga mga panginahanglan. Dili ginapabayad og buhis ang langyawng kapitalista sa ilang kita ug mga ginakonsomong produkto o serbisyo. Ginasumpo ang batakang katungod sa mga mamumuo aron ipailalum sila sa pinakagrabe dagway sa pagpahimulos. Ang ginamughang bili sa mga mamumuo wala natampo sa paglambo sa lokal nga ekonomiya apan ginaeksport lamang hinuon sa internasyunal nga *assembly line* sa dagkung korporasyong multinasyunal.

Ginahuthot sa mga dagkung langyawng kapitalista ang lokal nga rekurso. Lapad nga kayutaan ang ginailog o ginahikaw sa mga mag-uuma ug minoryang katawhan aron kawkawon ang bahanding mineral ug gamiton sa lapad nga plantasyon sa mga tanom nga pang-eksport. Gatasan ka libong ektarya ang ginahikaw sa produksyon sa pagkaon alang sa lokal nga pagproseso ug konsumo. Atrasado ang lokal nga produksyong agrikultural. Kulang kaayo sa pasilidad sa irigasyon ug mga makinarya sa pag-ugmad, pagtanom, pag-ani ug pagmomolino. Halos walay subsidyo ang guberno sa agrikultura.

Usa ka lalum nga samad ang krisis sa panginabuhian ang giantus karon sa tibuok katawhan. Walay pulos ang pangtapal nga mga lakang sa rehimen sama sa paghatag og mga subsidyo ug uban pa. Seguridad labaw usab nga mograbe ang pagsukol sa katawhan sa mosunod nga mga bulan.



Ibasura ang mini nga OLBARMM, sampa sa BHB—MRLO

Hugot nga gikundena sa Moro Resistance and Liberation Organization (MRLO) ang balaod nga Bangsamoro Organic Law (BOL), naila usab isip Organic Law for the Bangsamoro Autonomous Region in Muslim Mindanao (OLBARMM).

Matud nila, gisumite ang OLBARMM aron linglahon ang katawhang Moro. Sa paghatag og tap-haw nga awtonomiya, gigamit kining instrumento sa rehimeng US-Duterte aron pahinayon ang pakigbisog sa katawhang Moro samtang mayorya kanila nakasinati og grabeng kalisud ug kawalay-hustisya. Gipirmahan ni Rodrigo Duterte ang maong balaod niadtong Hulyo, human kini giratsada sa kongreso ug senado niadtong Mayo.

Matud sa MRLO, kaylap ang kalisud sa mga erya sa Moro ug seguradong magpadayon kini ilalum sa tukurong Bangsamoro. Walay nahilakip sa OLBARMM ang mahitungod sa pagpatuman sa tinuod nga repormang agraryo, usa sa nag-una ug kaylap nga hisgutanan sa han-ay sa mayorya sa katawhang Moro. Imbes nga reporma sa yuta, ang pagatukurong gubyernong Bangsamoro pa ang manguna sa pagtibuok og mga palisiya aron ablihan ang mga yutang kabilin sa langyawng kadaut.

Napamatud-an na kuni sa milabayng mga tuig, ilalum sa Autonomous Region in Muslim Mindanao (ARMM). Gipasigarbo sa ARMM ang paglambo kuno sa rehiyon bunga sa pagpasulod sa mga kumpanyang nagamina og nikel ug mineral, quarry, mga plantasyon sa palm oil ug biomass renewable energy. Luyo sa ginamugna niining trabaho, nagbunga usab kuni sa walay katugbang nga tantos sa kalisud—mokabat sa 60% sa halos upat ka milyong nanimuyo sa rehiyon ang matawag nga kabus.

Kakunsabo ang mga nagharing hut-ong Moro, ibaligya sa OLBARRM sa mga langyawng kumpanya ang bahandi ug rekurso sa rehiyon. Gitugyan na niini sa Malaysian Gas

Petronas, kumpanyang US nga nakabase sa Malaysia, ang binilyong kantidad sa lana sa Liguasan Marsh. Ibaligya usab ang Lanao Lake sa mga multinasyunal nga korporasyon ug mga lokal nga kumprador sama ni Manny Pangilinan. Pagrabehon pa sa mga kumpanyang UNIFRUITTI, Dole, Del Monte, La Frutera, Nestle, Mount Kalatungan Agri Ventures Inc., ug mga kumpanyang mina ang interbensyon sa mga yutang kabilin sa mga prubinsya sa Maguindanao, Basilan, Tawi-Tawi, Sulu, Sultan Kudarat, North Cotabato ug Lanao del Sur.

"Dili na usab katingalahan ang desisyon sa ilang lider sa MILF sa pagbuhi sa armadong pakigbisog, sa kasamtangan daghan kanila ang lakip na sa nagharing hut-ong—nag-iya og lapad nga plantasyon sa saging ug oil palm sa mga lungsod sa Sultan Kudarat, Sultan Mastura, Datu Odin Sinsuat ug Upi sa Maguindanao. Anaa usay mga mall, hotel ug restawran ang uban sa Cotabato ug Davao," matud ni Ka Jihad Al-Qursi, tigpamaba sa MRLO.

"Tungod dinhi, dali alang kanila nga itahan ang armadong pakigbisog tungod kay sila mismo ang makabenebisyo sa OLBARMM samtang ang mayorya sa katawhang Moro naglungang sa kalisud."

Dugang pa sa MRLO, ang tinuod, walay puas ang mga operasyong militar sa rehimeng US-Duterte batok sa katawhang Moro taliwala sa pakig-hisgot pangkalinaw niini sa MILF. Sa takuban sa gyera batok sa Bangsamoro Islamic Freedom Fighters, ang grupong mibulag sa



MILF, padayon ang pagpamomba sa Liguasan Marsh sa panahon sa Ramadan. Mibakwit ang 20,000 ka pamilya tungod niini.

Gipulbos usab ni Duterte ang Marawi City nga nagresulta sa pagbakwit sa 323,000, pagkaguba sa mga balay ug bilding ug pagkapatay sa liboan ka sibilyan. Taliwala sa "pakignegosasyon" sa rehimeng Duterte, gitambakan niini og kapin 30 ka batalyon sa AFP ang ARMM sa tinguhang puohon ang armadong grupong Moro sama sa BIFF, MNLF ug MILF. Nagapadayon kuni hangtod sa kasamtangan.

Matud ni Al Qursi, walay dapat isaulog ang katawhang Moro sa OLBARMM. Dili niini ginaresolba ang panawagan sa katawhang Moro alang sa katungod sa kaugalingong paghukom, panawagan alang sa hustiya ug pagduso sa kontrol sa ilang mga teritoryo ug yutang kabilin. Pakyas usab ang OLBARMM nga tubagon ang pangandoy sa katawhang Moro alang sa pag-ugmad sa kaugalingong yuta, tapuson ang diskriminasyon batok sa mga Moro

ug kagawasan batok sa reaksyunaryong rehimen nga gidumalahan ni Duterte sa kasamtangan.

Imbes nga hustisya, pagapalayason sa rehimen ug pipila ka pamilyang Moro ang katawhan, sa unsamang pamaagi. Mograbe ang kalisud ug kagutom. Liboan ka Moro ang mapugos nga ibaligya ang ilang kusog pamuo sa baratong kantidad aron makakaon samtang nagahakop ang mga korporasyon og ganansya.

"Nanawagan kami sa katawhang Moro nga ipadayon ang armadong pakigbisog luyo sa prubisyon sa OLBARMM nga magbuhi og armas ang BIAF. Ang pagdekomisyon (pagsurender sa armas) sa BIAF usa ka taktika lamang sa rehimen nga tangtangan og katakus nga manalipod ang mga komunidad sa Moro batok sa pwersa sa estado ug mga korporasyon nga nagtinghang kawkawon ang yuta ug bahandi sa Bangsamoro," matud ni Al Qursi. Ang BIAF (Bangsamoro Islamic Armed Forces,) ang nakabarug nga armadong hukbo sa MILF.

Giawhag usab sa grupo ang mga Moro nga mosalmot sa Bagong Hukbong Bayan, ang tinuod nga hukbo sa katawhang Pilipino ug Bangsamoro. Abli usab ang MRLO nga makigtinabangay sa mga elemento sa MILF, BIFF ug uban pang grupong Moro aron subling iaslang ang armadong pakigbisog hangtud nga makab-ot ang kagawasan sa kontrol sa imperyalismong US, pyudalismo ug burukrata kapitalismo. Kauban ang katawhang Moro sa pakigbisog alang sa nasudhong demokrasya.

Matud ni Al Qursi, gipamatud-an na sa kasaysayan nga dili makab-ot ang pagkinaugalingon ug kaugalingong paghukom sa pakighisgot pangkalinaw sa reaksyunaryong estado. Bugtong sa armadong pakigbisog lang makab-ot ang tinuod nga hustisya ug kagawasan. AB

Martsa sa mga mamumuo, gilunsad

GILUNSAD SA LAIN-LAIN unyon ug asosasyon sa mga mamumuo, kauban ang mga tawong simbahan ang "Martsa sa mga Mamumuo" padulong sa tulay sa Mendiola, sa Maynila niadtong Agosto 27. Gipanawagan nila ang pagtapos sa kontraktwalisasyon ug pagsukol sa gakahugno nga kahimtang sa mga mamumuo ug katawhan.

Sa pagpanguna sa Kilusang Mayo Uno (KMU) ug sa Church-Labor Conference nga gipangulohan ni Manila Auxiliary Bishop Broderick Pabillo, misalmot ang halos 20 ka organisasyon ug pipila ka libo sa martsa.

Samtang sa Davao City, kadunganan nga kalihukan usab ang gilunsad sa pagpaguna sa Samahan ng mga Manggagawa laban sa Kontraktwalisasyon (SAMA AKO). Gipahigayon usab ang kaparehong protesta sa mga syudad sa Cebu ug Bacolod sa Visayas. Samtang, gikasa sa kapin 300 ka mamumuo sa Liwayway Marketing Corporation ang ilang welga niadtong Agosto 24 human midumili ang maneydsment nga dunggon ang ilang makataru-

nganong panawagan nga himoong regular ang mga kontraktwal nga mamumuo.

Nakapailalum sa upat ka kontraktor ang mga mamumuo luyo sa pagmugna sa mga produkto sa Oishi (mga pagkaong tsitsirya) ug pagpatrabaho sa 15 ka tuig.

Kadungan niini, nagplano ang mga superbisor sa PLDT nga magwelga tungod sa sobrang pagpatrabaho kanila sa kumpanya nga nagbunga og kadaut sa ilang panglawas. Human ang malukpanong pagtangtang sa 12,000 ka kontraktwal sa kumpanya, gipasa ang tanan nilang trabaho sa mga superbisor. Tibuok ang suporta sa gitangtang nga mga mamumuo sa mga superbisor. AB

Pagbawi sa yutang kabilin sa mga Manobo

HINIUSANG GIOKUPA UG gibungkal sa 3,000 Manobo, sa pagpanguna sa KASILU (Kaugalingong Sistema Igpasasindog to Lumadnong Ugpaan) ang 200-ektaryang yuta sa Barangay Cawayan, San Fernando, Bukidnon niadtong Septyembre 4. Ang maong yuta giilog nilang Paquet Albona, Toto Espidoza ug Bennie Elumba.

Lima ka dekada na ang milabay sa dihang giilog gikan sa mga Manobo ang ilang yutang kabilin. Kanhi, talagsaon lang silang makasinati og kagutom tungod kay aduna igong pagkaon gikan sa ilang umahan. Naandan na nila ang sistemang "hunglusay" o tinabangay sa pagpang-uma. Sa yutang kabilin usab nila makuha ang mga tambal alang sa ilang mga balatian, limpyong tubig ug mga gamit alang sa pagtukod og balay.

Matud ni Datu Ekil Amas, secretary sa KASILU sa San Fernando, "bugtong sa nagkahiusang paglihok lang namo mabawi ang among yutang kabilin."

Naggikan ka 12 komunidad sa Manobo ang mga misalmot sa maong kalihukan, gikan sa mga barangay sa Magkalungay, Cawayan ug Poblacion.

Sa Norzagaray, Bulacan, naglunsad usab og kolektibong bungkalan ang 60 ka pamilyang mag-uuma sa 75 ektarya nga bahin sa Barangay San Mateo nga giangkong sa Royal Mollucan, usa ka kumpanya sa *real estate*. Lakip ang mga mag-uuma sa Samahan ng mga Magbubukid sa Compra ug gikan pa niining Setyembre 1 nagtanom og mga saging, humay ug utanon.

Niining Setyembre 6, gilusob sa mga armadong ginsakpan sa Royal Mollucan ang bungkalan ug gipangguba ang mga humay, lagotmon ug utan, ug bisan ang mga payag sa mag-uuma. Niadtong Setyembre 3, gipangpusil sa mga gwardya sa kumpanya ang mga mag-uumang nagbungkalan. AB

MGA PROTESTA SA KATAWHAN

SA BACOLOD CITY, nagkampuhan ang 1,500 ka myembro sa Kalipunan ng Damayang Mahihirap (Kadamay)-Negros niadtong Agosto 30 atubangan sa abandonadong mga pabalay sa guberno sa Barangay Felisa, Bacolod City.

Dugay na nga ginaduso sa Kadamay sa National Housing Authority nga ihatag kini sa mga kabus. Matud ni Berlita Ante, Secretary General sa Kadamay-Negros, dili nila pasudlan ang mga pabalay hangtud adunay panaghisgot tali sa Kadamay ug Bacolod NHA. Samtang, magpadayon ang protesta aron seguraduhong adunay dayalogo.

Kontra-terorismo. Nagprotesta ang lain-laing grupo sa mga nasudnong minorya sa Manila Regional Trial Court niadtong Agosto 31 kadungan sa paghaon sa mosyon aron tangtangan ang pangalan sa mga lider-katutubo sa listahan sa mga terorista sa usa ka kasong gipasaka sa Department of Justice. Misalmot sa kalihukan ang lain-laing grupo sa nasudnong minorya. Gikundena nila ang nagapadayon nga pag-aresto ug pagbilanggo sa mga lider-katutubo sa nasud nga mokabat na sa 170 ka indibidwal.

Pagpanalipod sa mga eskwelahan. Nagprotesta ang Save our Schools Network (SOS) ug Salinlahi Alliance atubangan sa kongreso niadtong Agosto 28 kadungan sa pagdungog sa badyet sa Department of Education.

Gipanawagan nila ang pagpagawas og mga permit alang sa mga eskwelahang Lumad ug gikundena ang pagtugot sa DepEd sa presensya sa mga sundalo sa ilang mga eskwelahan. Niining Setyembre 3, subling gitukod ang "Eskwelahang Bakwit" sa Metro Manila bitbit ang isyu sa militarisasyon ug pagpamig-ot sa rehimeng Duterte sa mga eskwelahang Lumad. AB

Militar ug pulisya, misabwag og kadaut sa kapupud-an

Tulo ka myembro sa usa ka organisasyon sa mag-uuma sa Compostela Valley ang magkasunod nga gipatay sa mga ginsakpan sa estado niining Agosto ilalum sa nagapadayon nga kadaut sa balaod militar sa Mindanao. Sa uban pang bahin sa nasud, nagahari usab ang teror sa uban pang yunit sa militar ug pulis.

Pagpatay. Sa Compostela Valley, gipusil-patay sa mga elemento sa 66th IB si Rolly Panebio, 46, aktibong myembro sa Compostela Farmers Association (CFA) niadtong Agosto 18, alas-10:30 sa gabii. Bag-o lang nahuman si Panebio sa iyang trabaho isip boluntir nga istap pangseguridad sa Salupongan Ta Tanu Igkanugon Community Learning Center sa Barangay Banggo sa dihang miabot ang duha ka lalaking sakay sa motorsiklo. Gidala sa mga lalaki si Panebio pipila ka metro ang gilay-on gikan sa eskwelahan ug dito na siya gipusil.

Pagka-ugma sa kaudtohon, gipusil-patay usab sa mga elemento sa 66th IB ang magtiayong Gilbert ug Jean Labial, parehong myembro usab sa CFA. Pauli na ang magtiayon gikan sa burol ni Panebio sa dihang makita ni Gilbert ang duha ka lalaking nag-atang duol sa kampo sa 66th IB sa Sityo Balite, Barangay Banakon sa parehong lungsod. Giliso ni Gilbert ang iyang motorsiklo pabalik apan gilakag sila sa mga krimenal ug gipangpusil hangtud mamatay.

Si Panebio ug ang magtiayong Labial aktibong nagabatok sa mina ug militarisasyon sa ilang lugar. Kanhi na sila nga gipasanginlan sa mga sundalo isip mga myembro sa Bagong Hukbong Bayan (BHB) ug pugos nga ginapasurender niadtong Pebrero ug Marso.

Sa Negros Oriental, gipusil hangtud mapatay si Heide Malalay Flores niadtong Agosto 21, pasado alas-6 sa gabii sa Poblacion, Guihulngan City. Kanhing aktibista si Flores ug ilado nga matinabangon sa katawhan ilabina sa kabus nga mag-uuma. Niadtong 2017, gibaharan si Flores sa grupong *vigilante*

nga Kawsa sa Guihulnganon Batok Druga ug Komunista human ang malampuson nga ambus sa BHB batok sa PNP.

Sa Cebu, gipatay sa pagpamusil niadtong Agosto 8 si Butch Rosales, 42, tigpanalipod sa katungod-tawo ug boluntir sa Rise Up Cebu. Nakasakay sa unahan sa dyip padulong Punta Engaño, Lapu-Lapu City si Rosales sa dihang gipusilsiya sa suspek nga milingkod sa iyang likuran. Miikyas ang krimenal sakay sa usa ka motorsiklo.

Sa Pangasinan, gipatay sa mga elemento sa PNP Regional Office 1 ang menor de edad nga si Joshua Laxamana, 17, samtang pauli sa Tarlac City ang ulitawo uban sa iyang higala nga si Julius Sebastian, 15. Gikan ang maghigala sa Baguio City aron mosalmot sa usa ka DOTA tournament (dula sa kompyuter). Ulahi silang nakita sa Sison, Pangasinan niadtong Agosto 16 nga naghulat og sakyanan pauli. Pagkaugma, gibalita sa PNP nga napatay kuno nila si Laxamana sa dihang "misukol" kini. Gipagawas pa sa PNP nga nalambigit ang menor de edad sa mga pagpangawat sa Pangasinan, adunay dala nga pusil ug shabu, ug milikay sa tskepyont sakay sa motorsiklo. Wala pa gihapon gipagawas sa PNP si Sebastian.

Pakyas nga pagpatay. Gisulayang patyon sa pagpamusil sa armadong lalaki niadtong Setyembre 4, bandang alas-6 sa buntag si Victor Ageas, lider sa Nagkahiusing Mamumuo sa Suyapa Farms-Kilusang Mayo Uno sa Compostela, Compostela Valley. Matud mismo kang Ageas, nagmaneho siya og motorsiklo padulong sa plantang gitrabahoan sa dihang gisundan siya

sa upat ka lalaking nakamotorsiklo ug gisugat sa upat pa sa kadalanan sa Crossing Blanco. Gipusil si Ageas duha ka metro lang ang gilay-on sa mga suspetsyado.

Ginatudlong motibo sa KMU ang plano sa NAMASUFA nga maglunsad og welga batok sa Sumifru tungod sa pagbalewala sa kumpanya sa CBA o *collective bargaining agreement* nga gipangulohan sa unyon.

Iligal nga pagpang-aresto. Niadtong Setyembre 2, tulo ka mag-uuma sa Barangay Calumpit, Lobo, Batangas ang iligal nga giaresto sa mga sundalo sa 2nd ID nga nakakampo tunga-tunga sa kabalayan sa maong baryo. Matud sa Kilusang Magbubukid ng Pilipinas, giaresto silang Marwin de Rafael, Santi Tatic ug Joselito Flores ug kasamtangang napreso sa PNP Lobo. Hugot nga ginasuklan sa katawhan sa Lobo ang planong pagtukod sa kumpanya sa mina sa lugsod.

Gipahigayon ang iligal nga pagpang-aresto sa parehong adlaw human ang pagdepensa sa BHB-Batangas batok sa atake sa 1st IB sa Sityo Silyaran sa parehong barangay. Gipabusikaran og bomba ug gipabuthan sa mga riple sa BHB ang mga tropa sa militar nga nagresulta sa pipila ka kaswalti sa ilang hanay.

Niadtong Agosto 11, giaresto si Arnold Albarillo sa duha ka pulis nga nakasibilyan sa Barangay Calsapa ug gidala sa kampo sa Provincial Public Safety Battalion sa Barangay Tacligan, San Teodoro, Oriental Mindoro. Gipailalum siya sa interogasyon sulod sa duha ka oras ayha gidala sa PNP San Teodoro. Gidetine siya sa mga kasong pagpatay, sulayng pagpatay ug rebelyon.

Gikan si Albarillo sa usa ka pamilyang dugay na nga ginapig-ot sa estado. Ang iyang ginikanan ug magulang nga igsuon biktima sa tortyur ug pagpatay sa militar. Niadtong Abril 2002, ilalum sa bangis nga pagpangulo sa kanhi Col. Jovito Palparan sa Mindoro, giakusahang myembro sa BHB ug gipatay

ang iyang mga ginikanan nga silang Manuela ug Expedito, nga kanhi mga koordineytor sa Bayan Muna. Niadtong 2012, gipatay sa 74th IB si Armando Albarillo, kuya ni Arnold ug kanhing pangkinatibuk-ang kalihim sa Bayan-Timog Katagalugan.

Samtang, niadtong hapon sa Agosto 15, iligal nga giaresto sa mga pulis si Mylene Santua, kanhing tigmaba sa grupong Coco Levy Fund Ibalik sa Amin (CLAIM), sa Barangay Pagsangahan, San Francisco, Quezon. Nanawagan ang CLAIM nga ibalik ang kapin P200 bilyong pondo sa coco levy sa mga magniniyog. Mabdos si Santua ug magpatan-aw unta sa duktor sa dihang gidakop siya. Kasamtangan siyang nakadetine sa Barangay Malamig sa parehong lungsod.

Pagpamomba. Nagbunga og grabeng kahadlok sa mga estudyante sa Salugpungan Ta Tanu Igkanugon Learning Center ang pagpamomba sa 10th ID niadtong Agosto 27 sa Barangay Dagohoy, Talaingod, Davao del Norte. Gihulog sa Philippine Air Force ang mga bomba niini duol lamang sa eskwelahan kung asa kasamtangang nagpahigayon og klase ang mga bata.

Militarisasyon. Sa Isabela, okupado sa 54th IB ang Barangay Sta. Isabel, Jones sukad pa niadtong Hulyo. Gipangulohan sa usa ka Lt. Amilao ang paglunsad og operasyong "community support program" ilalum sa Oplan Kapayapaan. Resulta niini, klase-klase ang paglapas sa mga katungod sa tagabaryo ang nataho, lakip ang pugos nga pagsulod ug iligal nga pagpangransak sa kabalayan, pagdaut sa mga pananom, pagpaniktik ug pag-akusa sa mga residente isip mga myembro o tigsuporta sa BHB. Nagpahamtang usab og *curfew* ang mga sundalo. Gawas sa 54th IB sa Jones, gioperasyonan usab sa 86th IB ug 95th IB ang mga lungsod sa San Agustin ug San Guillermo.

Sa Negros, nagagrabe ang mga paglapas sa 303rd IBde sa katungod sa katawhan sa isla sukad nga madestino dinhi ang 15th IB ug

94th IB niining unang tunga-tunga sa tuig. Gawas kini sa kadaut sa 62nd IB sa pipila ka lungsod sa isla. Gipangulohan ni Col. Alberto Desoyo ang 303rd IBde.

Padayon ang operasyong militar sa 15th IB sa South Negros, partikular sa mga lungsod sa Hinobaan, Ilog, Candoni, Sipalay City ug Basay sukad pa niadtong Marso. Matud ni Ka Juanito Magbanua sa BHB-Negros Island, ang maong mga operasyon sa 15th IB nagsilbing pagpangandam alang sa pagalunsarong pagbansay-militar nga Balikatan sa Oktubre. Sa mga baybay-dagat nga mga barangay sa Asia ug Sangke, ug sa utlanan sa Hinobaan ug Ilog, gimandoan sa mga sundalo ang mga residente nga tapuson ug biyaan ang ilang mga balay sa bukid.

Lakip usab sa mga krimen sa 15th IB ang pagpangulata ug pugos nga pagpagiya sa upat ka mag-uuma; pagpaniktik ug pagtarget sa mga residenteng gilista sa militar isip mga myembro o tigsuporta sa BHB; pagguba sa mga humayan, pananom ug ani; pagbawal sa mga residente nga moadto sa ilang mga bukid; ug pagbuhi sa mga gialimang hayop nga maoy hinungdan sa pagkamatay sa pipila niini.

Sa Central Negros, mala-halimaw nga gitake sa kapin 100 ka sundalo sa 94th IB ang mga syudad sa Guihulngan ug Canlaon, ug mga lungsod sa Magallon (Moises Padilla) ug Isabela. Dugang pa sa BHB-Negros, nagpakaarung-ingnon nga mga Pulang manggugubat ang mga elemento sa 94th IB ug pugos nga nagasulod sa mga balay ug nanghadlok sa mga residente. Tungod niini, dili makaadto sa ilang mga umahan ang mga baryohanon.

Halos lima ka bulan na usab nga okupado sa 62nd IB ang duha ka barangay sa Mabinay, duha pa sa Manjuyod, ug pipila sa Ayungon. Gigamit isip kampo sa mga sundalo ang mga *barangay hall* ug uban pang sibilyang istruktura, pugos nga ginasulod ang mga balay sa mga residente ug ginapasurender sila isip mga myembro sa BHB. AB

Krisis sa bugas ug pagkaon, gigamit alang sa todong liberalisasyon

Bisan og usa ka agrikultural nga nasud ang Pilipinas, nahikot karon sa pagtipid ang mga Pilipino tungod sa padayon nga pagsirit sa presyo ug hugot nga kontrol sa dagkung kapitalista sa suplay sa bugas, isda ug uban pang batakayang pagkaon.

Gikan 2017, misaka ang presyo sa bugas sa abereyds nga 10% matud sa datos sa reaksyunaryong gubyrno. Niadtong milabayng bulan, napugos nga magdeklara og *state of calamity* ang Zamboanga City human miabot og P70-P80/kilo ang presyo sa bugas sa lungsod.

Kadungan usab niining misaka ang mga presyo sa galunggong (P160-P200/kilo, mas taas og P20-P60 kaysa sa abereyds nga presyo sa merkado), tilapia (P130/kilo, mas taas og P30) ug bangus (P180/kilo, mas taas og P30).

Ginatagad sa rehimen ang krisis sa pagkaon isip usa sa mga nag-urang bahin kung nganong misirit ang implasyon sa 6.4%, ang pinakataas nga nataho sulod sa siyam ka tuig.

Apan imbis nga iduso ang pagpakusog sa lokal nga produksyon subay sa prinsipyo sa seguridad ug soberanya sa pagkaon ug agrikultura aron tubagon ang maong krisis, gihimong palusot kini karon sa mga upisyal sa rehimen sa ekonomiya ug ni House Speaker Gloria Macapagal-Arroyo aron iduso ang mas malukpanong pag-import sa mga produktong agrikultural subay sa mga palisiya sa World Trade Organization (WTO).

Sa partikular, ginapalusot nila ang pagpatuman sa mga palisiya nga labaw pang motangtang sa mga restriksyon sa pag-import ug mobira paubos sa mga taripa (buhis sa giimport nga produkto).

Gipasasan karon ang pagbalaod sa Rice Tariffication Bill nga hingpit nga motangtang sa restriksyong kantitatibo (o pagtakda sa gitugutang gidaghanon) sa pag-import og bugas ug magpahamtang na hinuon og 35% taripa dinhi nga nakatakda pa nga birahon sa mas ubos nga ang-ang sa

umaabot nga mga tuig. Ginapatuman usab sa Department of Agriculture niadtong milabayng bulan ang Fisheries Administrative Order 195 nga nagatugot sa pag-import og 17,000 metriko toneladang (MT) galunggong.

Pakanang neoliberal


Ilalum sa rehimeng Ramos niadtong 1995, ginaduso sa kanhing Senador Arroyo ang pagpirma sa Pilipinas sa Agreement on Agriculture (AOA) sa WTO. Subay sa AOA, obligado ang Pilipinas nga todong ablihan ang nasud sa pag-import sa mga produktong agrikultural ug pagtakda og ubos nga taripa. Giratipika sa Senado ang AOA pinaagi sa pagpasa sa Agricultural Tariffication Law.

Luyo niini, wala gilayon napatuman ang todong liberalisasyon sa bugas tungod sa hugot nga pagsupak ug pagbatok sa katawhan. Atubangan sa malukpanong mga protesta, napugos ang reaksyunaryong gubyrno nga mokuha og napulo ka tuig nga ekstensyon ayha tangtangan ang mga kantitatibong restriksyon sa bugas.

Bisan og nagpabiling 50% ang taripa sa bugas, giobligo sa WTO ang nasud nga mag-abli sa *minimum access volume* (MAV o minimum nga gidaghanon) sa pag-import og bugas. Nilimita sa 3% lang sa kinatibuk-ang lokal nga produksyon ang MAV, apan sa aktwal milapas dinhi ang gidaghanon sa giimport nga bugas.

Sa dihang subling nangayo og ekstensyon ang reaksyunaryong gubyrno niadtong 2004 ug 2012, subling nagpahamtang ang WTO sa mga tagilid nga kundisyon sa pakigpamatigayon. Sa ikaduhang ekstensyon, gikunhuran niini sa 40% ang taripa sa bugas, ug gikan 40% padulong 35% ang sa imported nga karne. Sa ikatulong ekstensyon, mitaas sa 7% ang MAV at mikunhod sa 35% ang taripa sa bugas. Gipausan usab ang taripa sa karne, lamang loob sa baboy ug manok ug mga produktong gatas.

Sa kasamtangan, Pilipinas na lamang ang myembrong-nasud sa WTO nga aduna pay nahabilin nga kantitatibong restriksyon sa pag-import. Ginapahimuslan karon sa rehimen ang pagsirit sa presyo sa mga produktong pagkaon aron hatagag katarungan ang todong liberalisasyon sa pag-import og bugas ug galunggong sa lokal nga merkado.



Burong nga lohika

Gipanghimakak sa Ibon Foundation ang lohika nga mapalig-on o moubos ang presyo sa pagkaon pinaagi sa dugang nga importasyon.

Gipakita niini nga adunay mga tuig nga taas ang pag-import apan nagpadayon ang pagsirit sa presyo. Pananglitan, tulo ka tuig ayha paspas nga mitaas ang presyo sa P7.99 matag kilo niadtong 2008, nag-import na ang nasud sa tinuig nga abereyds nga 1.8 milyong MT. Niadtong 2008-2010, nag-import ang nasu sa tinuig nga abereyds nga 2.2 milyong MT, samtang padayon nga mitaas ang presyo sa bugas sa tinuig nga abereyds nga P1.20 hanggang 2016.

Wala usay regulasyon ang gubyerno sa presyo sa giimport nga bugas kung ibaligya na kini sa lokal, dugang sa Ibon. Daghang higayon sa nangagi nga wala misabay ang lokal nga presyo, ilabina ang presyo sa retail sa presyo sa pangkalibutang merkado. Adunay mga panahon nga samtang paubos ang lihoc sa pangkalibutang presyo sa bugas, pataas kini sa lokal. Daku ang papel dinhi sa mga komersyantaleng nagakontrol sa suplay ug presyo sa bugas ug pagdumili sa gubyerno nga atimanon ang interes sa mamalitay batok sa grabeng pagsaka sa presyo.

Tin-aw nga pulos pakana lang sa rehimeng US-Duterte ang mga programa niini sa pag-import aron iduso ang liberalisasyon sa mga subsektor sa agrikultura nga aduna pay nahabiling proteksyon, subay sa dikta sa WTO. Nagpamatuod lamang kini nga walay plano ang reaksyunaryong gubyerno nga pakusgon ang lokal nga produksyong agrikultural ug padayon na hinuon niining himuong dominante ang mga neoliberal nga kasabutan sa pamatigayon nga dugay nang ginagamit sa mga imperyalista aron igapos ang Pilipinas sa ilang dominasyon. AB

Mga sibilyan, gimasaker sa mga pasistang tropa sa India

India Kinse ka sibilyan ang gimasaker sa mga pulis sa India niadtong Agosto 6 sa baryo sa Nulkatong sa lungsod sa Sukma, Chattisgarh. Aron tabunan ang krimen, gipagawas sa mga pulis nga armado ug mga myembro sa milisyang bayan sa Communist Party of India (CPI)-Maoist ang maong mga sibilyan. Gipanghimakak kini sa mga paryente ug silingan sa mga biktima.

Niadtong Agosto 8, gikasuhan sa grupong tigpanalipod sa katungod-tawo ang mga pulis.

Matud sa mga pulis, nakigsinukliay og buto ang mga sibilyan ug nakakumpiska pa kuno sila og 13 ka mugbong kalibreng armas gikan sa nahitaboan. Gipasul-ob usab nila og unipormeng komoplahe ang usa sa mga napatay, ang 14-anyos nga si Muchaki Muka. Gipanghinambog sa reaksyunaryong estado sa India ang masaker isip "pinakadakung operasyon" batok sa mga Naxalista (tawag sa mga Maoista sa India) sa estado sa Chattisgarh. Kabahin ang Chattisgarh sa gitawag nga "Red corridor," mga lugar nga kusog ang presensya sa CPI-Maoist ug sa armadong hukbo niini, ang People's Liberation Army.

Apan matud sa imbestigasyon sa Scroll.in, usa ka independyenteng midya sa India, natulog sa usa ka "khetta" o "ladi," usa ka payag nga temporaryong pahulayan sa mga mag-uuma sa panahon sa pagtanom ug ani, ang 30 katawo sa dihang gipaulanan sila og bala sa mga pulis. Sa 15 nga napatay, upat ang menor de edad. Upat ang giaresto, usa ang grabeng nasamdan samtang nakaikyas ang nahabilin. Sa listahan nga gipagawas mismo sa CPI-Maoist, wala ni usa kanila ang myembro sa ilang hukbo o sa ilang milisya. Napamatud-an mismo sa imbestigasyon sa mga pulis nga ang "pipila" sa mga biktima dili Maoista.

Gipanghingusog usab dili lang sa mga paryente sa mga biktima, kundili lakip na sa ilang mga silingan, nga mga sibilyan ang gimasaker sa mga pulis. Lakip dinhi ang tulo ka manag-ig-agaw nga menor

de edad, nga mikuyog lamang sa ilang amahan ug angkul. Sa pagkatinuod, duha lamang ang adunay plano nga matulog sa *khetta* niadtong gabiuna. Midaghan lang sila sa dihang nagsugod nga mag-operasyon ang mga tropa sa pulis sa Nulkatong ug kasikbit nga mga baryo.

Matud pa sa paryente sa mga biktima, mihapit ang 30 ka sibilyan sa maong *khetta* aron makaikyas sa pagpang-abuso sa mga pulis sa sinugdanan sa Agosto. Kasagaran, arbitraryong ginapreso ug ginakulata sa mga pulis ang mga lalaking residente sa panahong mosulod sila sa lugar. Ginakawat usab nila ang bugas ug manok sa tagabaryo.

Sa kalambigit nga balita, midaghan ang mga organisasyon sulod ug gawas sa India nga nagabatikos kanga Nahendra Modi, punong ministro sa nasud, sa ginapahigayon niyang *crackdown* sa mga aktibista aron sumpuon ang mga lehitimong protesta batok sa mga palisiya sa iyang rehimen.

Naglunsad og serye sa reyd ug pagpang-aresto ang pulis sa India sa unom ka estado batok sa mga lider sa komunidad, lakip ang nailang mga intelektwal niadtong Agosto 28. Giaresto ug giditine niini silang Sudha Bharadwaj, abugado ug tigpanalipod sa katungod-tawo; Varavara Rao, nailang manunulat ug manunula ug iyang duha ka anak nga babaye nga silang Anala ug Pavana; Arun Ferreira, manunulat ug aktibista; reporter ug aktibistang si Gautam Navlakha; Vernon Gonsalves, manunulat ug aktibista; Stan Swamy, Katolikong pari ug aktibista;

Anand Teltumbde, propesor ug siyentista; K. Satyanarayana, propesor; KV Kurmanath ug Kranti Tekula, mga peryodista; ug Jiten Yumnam, peryodista ug tigpanalipod sa katungod-tawo. Giaresto sila sa suspetsang sukaranan nga nalambigit sila sa gama-gamang estorya sa planong asasinasyon kang Modi ug pagpanguna kuno sa protesta niadtong nangaging tuig aron suportahan ang mga Adivasi, ang kolektibong ngalan sa mga nasudnong minorya sa India. Giakusahan usab silang tigsuporta sa CPI-Maoist ug sa armadong hukbo niini, ang People's Liberation Army, nga nag-unang nakabase sa lugar sa mga Adivasi.

Mikabat sa 12 ka organisasyon gikan sa India, Nepal, Germany, Bangladesh ug Pilipinas ang mipirma sa petisyon aron ibasura ang gama-gamang mga kaso batok sa mga aktibista ug hinanali silang buhian.

Nanawagan usab niadtong Agosto 17 ang ILPS-Canada nga hinanali ug walay kundisyon nga buhian silang G.N. Saibaba, lakip ang "India 5" ug tanang bilang-gong pulitikal sa India kalambigit sa ika-72 ka tuig sa kagawasan sa India.

Si Saibaba usa ka iladong propesor sa literatura sa Delhi University. Ang lima ka aktibista usab ang hugot nga tigpanalipod sa katungod-tawo, ilabina sa mga Adivasi. Giaresto sila niadtong Hunyo 2017.

Sa maong tuiga, gihukman si Saibaba og tibuok-kinabuhi nga pagkabilanggo, kauban silang Hem Mishra, Prashant Rahi, Mahesh Tirki ug Pandu Narote. Gipasanginlan silang adunay kalambigitan sa mga Maoista. Napreso karon si Saibaba sa notoryus nga presohan sa Nagpur bisan luyo sa iyang nagkagrabeng balatian. AB

Mga grupong progresibo sa Colombia, nagkahiusa

NAGHIUSA ANG LIMA ka grupong progresibo sa Colombia aron tukuron ang lapad nga demokratiko ug anti-imperyalistang prente ilalum sa International League of Peoples' Struggle (ILPS) niadtong Agosto 10-11.

Matud ni Prof. Jose Ma. Sison, tserman sa International Coordinating Committee sa ILPS, tukma sa panahon ang paglunsad og asembleya ilalum sa tema alang sa katilingbanong hustisya ilabina human gitahan sa FARC (Fuerza Armada Revolucionario de la Colombia) ang armadong pakigbisog bugti sa pipila ka konsesyon sa pulitika gikan sa reaksyunaryong estado sa nasud. Walay mahitabo sa gipirmahan nga kasabutan tali sa FARC ug sa gubyernong Colombian, matud ni Sison, ug dili mata-gamtaman ang katilingbanong hustisya hangtud nakapailalum ang nasud sa paghari sa imperyalismong US ug samtang labaw nga nagkagrabe ang pagpangdaugdaug ug pagpahimulos sa mga nagharing hut-ong sa Colombia sa katawhan. Misulod sa pinal nga kasabutan alang sa pagbuhi sa armas ang FARC niadtong 2016, bugti sa tulo ka pwesto sa parlamento ug amnestiya alang sa mga manggugubat niini.

Matud pa kang Prof. Sison, ang mga progresibong grupong nagkahiusa ang anaa sa pusisyon aron tukion ang kasaysayan ug ilatag ang kasamtangang kahimtang sa katawhan sa Colombia. Panahon karon sa grabeng kumpetisyong pang-ekonomiya ug panagbangi sa pulitika sa han-ay sa mga imperyalistang poder ug nagkagrabe ang ilang pagpangdaugdaug ug pagpahimulos sa mga katawhan sa kalibutan, matud ni Sison. Tungod sa ilang taphaw nga mga makikaugalingong interes, sila na mismo ang mitukmod sa proletaryo ug katawhan nga mosukol ug ilingkawas ang kaugalingon.

Partikular sa Latin Amerika, kung asa nahisakop ang Colombia, gigamit sa US ang mga alyado ug

mga suluguon niini sa natad sa pulitika ug ekonomiya aron sumpuon ug pukanon ang mga anti-imperyalista, demokratiko ug rebolusyonaryong pwersa ug katawhan. Kadungan niini, ginapugngan usab sa US ang pagsulod sa kapital sa China sa usa ka rehiyong pinakaduol nang matawag nga likuran. Ingonpaman, kusog ang pagsukol sa maong mga nasud, sama sa Cuba ug Venezuela, batok sa interbensyon sa US. Laumang mograbe pa ang mga paningkamot nga ipahamtang ang paghari niini sa Latin America, matud pa ni Sison.

Sa ingon, kinahanglang andam usab ang mga progresibong grupo nga palapdon ug pasubsubon ang lain-laing porma sa pagsukol tali sa US ug katawhan sa Latin America. "Sa sunod lima hangtud 10 ka tuig, mamahimo kitang saksi sa walay kapares nga pagbuto sa mga bula sa ekonomiya ug pulitika sa pangkalibutang sistemang kapitalista ug ang walay kapares nga pagtaas sa ang-ang sa pagsukol sa katawhan," dugang pa ni Sison.

Gilangkuban ang ILPS-Colombia sa La Corporacion para Investigacion y la Educacion Popular, El Movimiento por la Defensa de los Derechos del Pueblo, El Movimiento por la Constituyente Popular, el Colectivo Nacional Sindical Clasista "Guillermo Marín" ug Organizacion de Mujeres del Pueblo de Colombia.

Kabahin karon ang ILPS-Colombia sa 200 myembrong organisasyon sa 40 ka nasud sa lima ka kontinente nga magpadayon sa pagpakusog sa panaghiusa, pagtinabangay ug koordinasyon sa mga anti-imperyalista ug demokratikong pakigbisog sa tibuok kalibutan pinaagi sa nagkadkung kalihukan sa 17 ka isyung multisektoral. AB